



СТАНДАРТ, ХЭМЖИЛ ЗҮЙН ГАЗРЫН  
ДАРГЫН ТУШААЛ

2021 оны 13 сарын 10 өдөр

Дугаар А/49

Улаанбаатар хот


Хэмжих хэрэгслийн шалгалт  
баталгаажуулалтын гэрчилгээ бичих журмыг  
шинэчлэн батлах тухай

Засгийн газрын агентлагийн эрх зүйн байдлын тухай хуулийн 8 дугаар зүйлийн 8.4 дэх хэсэг, Хэмжил зүйн тухай хуулийн 10 дугаар зүйлийн 10.5 дахь хэсэг, Стандарт, хэмжил зүйн газрын даргын зөвлөлийн 2021 оны 03 дугаар сарын 24-ний өдрийн хуралдааны тэмдэглэлийг тус тус үндэслэн ТУШААХ нь:

1. "Хэмжих хэрэгслийн шалгалт баталгаажуулалтын гэрчилгээ бичих журам"-ыг хавсралт ёсоор шинэчлэн баталсугай.


2. Хэмжих хэрэгслийн шалгалт баталгаажуулалтын гэрчилгээ, хэмжих хэрэгсэл ашиглалтад тэнцэхгүй болохыг тогтоосон мэдэгдэл хэвлүүлэх зардлыг байгууллагын жил бүрийн төсөвт тусган санхүүжүүлж, зарцуулалтад хяналт тавьж ажиллахыг Тамгын газар /Б.Эрдэнэзул/, журмын хэрэгжилтийг хангаж ажиллахыг Хэмжих хэрэгслийн шалгалт, баталгаажуулалтын газар /Л.Баярхүү/, аймгийн Стандарт, хэмжил зүйн хэлтсийн дарга нарт, журмын хэрэгжилтэд хяналт тавьж ажиллахыг Стратегийн бодлого төлөвлөлт, дотоод аудитын газар /Б.Ууганбаяр/-т тус тус даалгасугай.

3. Энэ тушаал батлагдсантай холбогдуулан Стандартчилал, хэмжил зүйн газрын даргын 2013 оны А/109 дүгээр тушаалын гуравдугаар хавсралтыг хүчингүй болсонд тооцсугай.



028028887

Стандарт хэмжил зүйн газрын даргын  
2021 оны 11 дугаар сарын 21 ны өдрийн  
А/39 дугаар тушаалын хавсралт



## ХЭМЖИХ ХЭРЭГСЛИЙН ШАЛГАЛТ БАТАЛГААЖУУЛАЛТЫН ГЭРЧИЛГЭЭ БИЧИХ ЖУРАМ

### Нэг. Нийтлэг үндэслэл

- 1.1 Хэмжил зүйн тухай хуулийн 9 дүгээр зүйлийн 4 дэх заалтын дагуу хэмжих хэрэгслийн баталгаажуулалтын гэрчилгээг бичихэд энэхүү журмыг баримтлана.
- 1.2 Шалгалтын үр дүнгийн дагуу стандартын шаардлага хангаж тэнцсэн хэмжих хэрэгсэлд Хэмжил зүйн төв байгууллагаас баталсан загвар бүхий шалгалт баталгаажуулалтын гэрчилгээг олгоно.
- 1.3 Баталгаажуулалтын гэрчилгээг Хэмжил зүйн төв байгууллагаас улсын шалгагчийн эрх авсан ажилтан өөрөө бичнэ.
- 1.4 Хэмжил зүйн төв байгууллагаас олгосон баталгаажуулалтын гэрчилгээг дугаарын дараалал (өгсөх дугаар)-аар бичнэ.
- 1.5 Хэмжих хэрэгслийг шалгаж баталгааны тэмдэг дарсан даруйд гэрчилгээ бичнэ.
- 1.6 Хэмжих хэрэгслийг шалгахгүйгээр баталгаажуулалтын гэрчилгээ олгох, сунгахыг хориглоно.
- 1.7 Мэдээлэл нь засвартай, эсхүл буруу, дутуу бичсэн шалгалт баталгаажуулалтын гэрчилгээг хэрэглэгчдэд олгохыг хориглоно.
- 1.8 Мэдээлэл бичигдээгүй гэрчилгээн дээр улсын шалгагчийн тэмдэг дарахыг хориглоно.
- 1.9 Улсын баталгаажуулалтад заавал хамрагдах хэмжих хэрэгслийн дэлгэрэнгүй жагсаалтад заасан хэмжих хэрэгсэл (худалдааны туухайнаас бусад) тус бүр дээр шалгалт баталгаажуулалтын гэрчилгээ бичнэ.

## **Хоёр. Шалгалт баталгаажуулалтын гэрчилгээг бичих**

2.1 Улсын шалгагч нь баталгаажуулсан хэмжих хэрэгслийн дараах мэдээллийг шалгалт баталгаажуулалтын гэрчилгээн дээр үнэн зөв, бүрэн, ямар нэгэн засваргүйгээр заавал бичнэ. Үүнд:

**2.1.1 Хэрэглэгчийн нэр:** Хэрэглэгчийн нэрийг тодорхой, аль болох дэлгэрэнгүй бичнэ. Хэмжих хэрэгсэл нь цахилгаан, дулаан түгээх тусгай зөвшөөрөл эзэмшигчийн өмч, эсхүл Хэмжил зүйн төв байгууллагаас хэмжил зүйн ажил, үйлчилгээ эрхлэх чадавхаа үнэлүүлсэн хуулийн этгээдийн худалдах зорилгоор баталгаажуулж байгаа хэмжих хэрэгсэл бол хэрэглэгчийн нэрийг бичихгүй байж болно.

**2.1.2 Хэмжих хэрэгслийн загвар:** Хэмжих хэрэгслийн улсын бүртгэлд бүртгэгдсэн болон Хэмжил зүйн төв байгууллагын шийдвэрээр загварыг нь шууд хүлээн зөвшөөрсөн хэмжих хэрэгслийн загварыг бичнэ. Загварын бичлэгийг товчлон бичихийг хориглоно.

**2.1.3 Хэмжих хэрэгслийн хэмжих хязгаар:** Хэмжих хэрэгсэл нь зөвшөөрөгдөх хамгийн их алдааны хязгаарт тасралтгүй ажиллах боломжтой хэвийн хэмжих хязгаарыг бичнэ.

**2.1.4 Хэмжих хэрэгслийн дугаар:** Хэмжих хэрэгслийн загварын хувьд дахин давтагдахгүй байх цуврал дугаарыг бичнэ.

**2.1.5 Хэмжих хэрэгслийн нэр:** Хэмжих хэрэгслийн хийц, хэмжих орчин, ажиллах зарчим, зориулалт гэх мэт онцлог байдлаас нь хамааран Улсын баталгаажуулалтад заавал хамруулах хэмжих хэрэгслийн дэлгэрэнгүй жагсаалтад заасан хэмжих хэрэгслийн нэртэй нийцүүлэн бичнэ.

**2.1.6 Лацны төрөл, дугаар:** Хэмжих хэрэгсэл дээр лац ломбо ашиглан битүүмжилсэн бол улсын шалгагчийн тэмдгийн дугаарыг бичнэ. Харин наах зориулалттай цаасан баталгааны тэмдгээр битүүмжилсэн бол улсын шалгагчийн тэмдгийн дугаарыг бичнэ.

**2.1.7 Баталгаа хүчинтэй байх огноо:** Хэмжих хэрэгслийг баталгаажуулсан огноо дээр Хэмжил зүйн төв байгууллагаас баталсан хэмжих хэрэгслийн баталгаажуулалт хоорондын хугацааг нэмсэн огноог бичнэ.

**2.1.8 Шалгалтын дараах заалт:** Шалгалтын дараах хэмжих хэрэгслийн заалтыг бичнэ.

**2.1.9 Лабораторийн тэмдэг:** Ямар хэмжлийн төрөлд хамаарахаас шалтгаалан тухайн хэмжлийн төрлийг хамаарах лабораторийн тэмдгийг дарна.

**2.1.10 Улсын шалгагчийн тэмдэг, гарын үсэг:** Хэмжих хэрэгсэл баталгаажуулсан улсын шалгагч гарын үсэг зурж, тухайн улсын шалгагчид Хэмжил зүйн төв байгууллагаас олгосон хувийн дугаар бүхий улсын шалгагчийн тэмдгийг дарна.

**2.1.11 Баталгаажуулсан огноо:** Хэмжих хэрэгслийг баталгаажуулсан огноог бичнэ.

**2.1.12 Тусгай тэмдэглэл:** Баталгаажуулсан хэмжих хэрэгслийн хийц, хэмжих орчин, ажиллах зарчим, зориулалт гэх мэт онцлог байдлаас нь хамааран гэрчилгээн дээр зайлшгүй бичих шаардлагатай техникийн болон хэмжил зүйн үзүүлэлт, бусад мэдээллийг бичнэ. Тусгай тэмдэглэл бичсэн тохиолдолд улсын шалгагчийн гарын үсэг зурж тэмдэг даран огноог бичнэ.

### **Гурав. Гэрчилгээний бичилтэд тавих хяналт**

**3.1** Хэмжих хэрэгслийн шалгалт, баталгаажуулалт хариуцсан нэгжийн дарга болон аймгийн Стандарт, хэмжил зүйн хэлтсийн дарга шалгалт баталгаажуулалтын гэрчилгээний бичилтэд хяналт тавина.

### **Дөрөв. Хүлээлгэх хариуцлага**

**4.1** Энэхүү журмыг зөрчсөн этгээдэд холбогдох хууль тогтоомжид заасны дагуу эрх бүхий албан тушаалтан хариуцлага хүлээлгэнэ.

----- о О о -----